



ქალაქ ფოთის მუნიციპალიტეტის საკრებულო



## განკარგულება N 12/46

2019 წლის 29 მაისი

### ქალაქი ფოთი

“ქალაქ ფოთის მუნიციპალიტეტის სასაფლაოების მოწყობისა და მოვლა-პატრონობის წესის დამტკიცების შესახებ” ქალაქ ფოთის მუნიციპალიტეტის საკრებულოს 2014 წლის 7 ივლისის №14/19 დადგენილების შესაბამისად, სოციალურად დაუცველი პირებისთვის შეღავათის დაწესების შესახებ

საქართველოს კონსტიტუციის მე-5 მუხლის პირველი პუნქტის თანახმად, საქართველო არის სოციალური სახელმწიფო, შესაბამისად, სახელმწიფო ზრუნავს საკუთარი მოქალაქეების სოციალური უფლებების დაცვაზე.

“ქალაქ ფოთის მუნიციპალიტეტის სასაფლაოების მოწყობისა და მოვლა-პატრონობის წესის დამტკიცების შესახებ” ქალაქ ფოთის მუნიციპალიტეტის საკრებულოს 2014 წლის 7 ივლისის №14/19 დადგენილებით დამტკიცებული წესის მე-5 მუხლის მე-3 პუნქტის შესაბამისად, სასაფლაოების მმართველი ორგანიზაციის მიერ გაწეული მომსახურების სახეობები და საფასურები, ასევე მისი გადახდისაგან განთავისუფლებისა და შეღავათების გაწევის წესი განისაზღვრება საკრებულოს სამართლებრივი აქტით.

სოციალურად დაუცველ ოჯახებს არ აქვთ საშუალება, დაფარონ გარდაცვლილი ოჯახის წევრის დასაფლავების ხარჯები (საფლავისთვის მიწის გამოყოფის საფასური, დაკრძალვის ნებართვის გაცემისა და მომსახურების საფასური) “ქალაქ ფოთის მუნიციპალიტეტის სასაფლაოების მოწყობისა და მოვლა-პატრონობის წესის დამტკიცების შესახებ” ქალაქ ფოთის მუნიციპალიტეტის საკრებულოს 2014 წლის 7 ივლისის №14/19 დადგენილების შესაბამისად. ამდენად, მიზანშეწონილია სოციალურად დაუცველ ოჯახებს დაუწესდეს შეღავათი, კერძოდ: საფასურის გადახდისგან განთავისუფლდეს სოციალურად დაუცველი ოჯახების მონაცემთა ერთიან ბაზაში რეგისტრირებული გარდაცვლილი პირის ოჯახი, რომლის სარეიტინგო ქულა არ აღემატება 100 000-ს. აღნიშნული გარემოება, ხელს შეუწყობს სოციალურად დაუცველი ოჯახების უფლებების დაცვას საქართველოს კონსტიტუციის მე-5 მუხლის პირველი პუნქტის შესაბამისად.

#### აღნიშნულიდან გამომდინარე:

##### მუხლი 1.

ქალაქ ფოთის მუნიციპალიტეტის საკუთრებაში არსებულ სასაფლაოებზე დასაფლავების საფასურის (საფლავისთვის მიწის გამოყოფის საფასური, დაკრძალვის ნებართვის გაცემისა და მომსახურების საფასური) გადახდისგან განთავისუფლდეს სოციალურად დაუცველი ოჯახების მონაცემთა ერთიან ბაზაში რეგისტრირებული გარდაცვლილი პირის ოჯახი, რომლის სარეიტინგო ქულა არ აღემატება 100 000-ს. საფლავის ფართი განისაზღვროს 6 კვ.მეტრით.

##### მუხლი 2.

განკარგულება ძალაშია ხელმოწერისთანავე.

საკრებულოს თავმჯდომარის მოვალეობის  
შემსრულებელი, თავმჯდომარის მოადგილე



აკაკი დარჯანია